




Pranimar / Dorezuar Punimjen / Prilato Received / Delivered	23 . 11 . 2020	0 viti god year	
Organ / Shista Org / Unit	H / Prot It / Prot Prot No	Shtojca Prilog Appendix	Sasia Kolicina Quantity
SKRMBHCK	2732/2020		114



**Republika e Kosovës**  
**Republika Kosova – Republic of Kosovo**

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**  
**NEZAVISNI NADZORNI ODBOR CIVILNE SLUŽBEKOSOVA**  
**INDEPENDENT OVERSIGHT BOARD FOR THE CIVIL SERVICE OF KOSOVO**

A nr.290/2020

Këshilli i Pavarur Mbikëqyrës për Shërbimin Civil të Kosovës – Kolegji për shqyrtimin e ankesave i përbërë nga: Jeton Koca-kryetar, Malsore Gashi-Bajraktari dhe Eshref Shabani-anëtarë dhe Ilire Mehmeti-Shaqiri-Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën A.nr.290/2020, të datës 08.10.2020, të parashtruar nga ankuesit [REDACTED] [REDACTED] me adresë banimi Rr. “Muharrem Ibrahim” Nr.430, Komuna e Gjilanit, kundër organit të punësimit Agjencia Kosovare e Privatizimit, në çështjen juridike “pezullim parandalues”, duke vepruar në pajtim me nenin 6 paragrafin 1 nën paragrafin 1.1, dhe nenin 18 paragrafin 1 nën paragrafin 1.1 dhe 1.2 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, të mbajtur më datë 23.11.2020, mori këtë:

**V E N D I M**

**I. APROVOHET pjesërisht si e bazuar ankesa A.nr.290/2020 e datës 08.10.2020, e parashtruar nga ankuesi [REDACTED] [REDACTED], lidhur me ndalimin e 50% të pagës prej datës 01.09.2020, ndërsa refuzohet si e pa bazuar pjesa që ka të bëjë me pretendimin për kthim në vendin e punës.**

**II. ANULOHET Vendimi me numër Nr.DM 220/2020 i datës 01.09.2020 i Drejtorit Menaxhues të Agjencisë Kosovare të Privatizimit, me të cilin ankuesit i është ndërprerë kompensimi i 50% të pagës mujore.**

**III. MBETET në fuqi Vendimi me numër Nr.7206 i datës 19.09.2014 i Agjencisë Kosovare të Privatizimit për pezullimin parandalues me 50% të pagës, të ankuesit, deri në marrjen e vendimit përfundimtar nga gjykata.**

**IV. OBLIGOHET Drejtori Menaxhues i Agjencisë Kosovare të Privatizimit, që të bëjë zbatimin e këtij vendimi brenda afatit prej pesëmbëdhjetë (15) ditësh nga dita e pranimit të këtij vendimi, duke i bërë kompensimin e 50% të pagës së ankuesit nga data 01.09.2020 deri në zbatimin e këtij vendimi, ndërsa të vazhdojë të bëhet pagesa në listën e pagave me 50% të pagës mujore sipas pikës 3 të këtij vendimi.**

**V. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim për veprimet e ndërmarra.**

**VI. Vendimi hynë në fuqi ditën e nënshkrimit nga Kryetari i Kolegjit.**



## A r s y e t i m

██████████ ██████████, Drejtor i Departamentit Ligjor në Agjencinë Kosovare të Privatizimit, përmes vendimit 7206 të datë 19.09.2014 të Menaxheres se Personelit është pezulluar nga marrëdhënia e punës me 50% të pagës mujore, pas njoftimit me numër PPS 36/14 dhe PPKR.nr.44/14 të datës 18.09.2014 të Gjykatës Themelore në Prizren se ndaj ankuesit ka filluar procedura penale.

Pas hyrjes në fuqi të Ligjit Nr.06/L-114 për Zyrtarët Publikë, Drejtori Menaxhues i Agjencisë Kosovare të Privatizimit ka nxjerr Vendimin me numër DM 220/2020 të datës 01.09.2020 përmes të cilit ankuesit ia ka ndërprerë pagesën prej 50% të pagës mujore të cilën ankuesi e realizonte sipas vendimit nr. 7206 të datë 19.09.2014.

Ankuesi i pakënaqur me Vendimin numër DM 220/2020 të datës 01.09.2020 (të pranuar nga ankuesi me datë 09.09.2020), më datë 08.10.2020 ka parashtruar ankesën me Nr.prot: 2012/2020 në Këshillin e Pavarur Mbikëqyrës për Shërbimin Civil të Kosovës.

Këshilli i Pavarur Mbikëqyrës për Shërbimin Civil të Kosovës, ankesën e ankuesit e ka proceduar te Agjencia Kosovare e Privatizimit për përgjigje në ankesë, ndërsa me datë 23.10.2020 ka pranuar përgjigjen në ankesë nga Agjencia Kosovare e Privatizimit me shkresat e bashkangjitura të lëndës.

**Kolegji për shqyrtimin e ankesave, për marrjen e vendimit meritor ka administruar këto prova:** Ankesën me numër të protokollit 2012/2020 të datës 08.10.2020 të parashtruar në Këshillin e Pavarur Mbikëqyrës për Shërbimin Civil të Kosovës: Akt Emërimin e datës 30.12.2011 të ankuesit: Kërkesën e datës 20.10.2019: Kërkesën për shfuqizimin e vendimit mbi pezullimin parandalues të datës 03.12.2019: Vendimin e datës 01.09.2020 me numër DM-220/2020: Përgjigjen në kërkesë për opinion të datës 23.01.2020: Parashtrësia për plotësimin e ankesës me numër të protokollit 2089/2020 të datës 14.10.2020: Kërkesë për pezullimin e ekzekutimit të vendimeve me numër të protokollit 1584/2020 të datës 06.10.2020: Kërkesën për përgjigje në ankesë me numër të protokollit 2132/2020 të datës 16.10.2020: Përgjigjen në ankesë me numër të protokollit 2331/2020 të datës 23.10.2020: Vendimin me numër të protokollit 7206/14 të datës 19.09.2014: Akt emërimin me numër 190/DL1 të datës 05.08.2014: Shkresën lidhur me kushtet e punësimit: Përgjigjen lidhur me kërkesën për shfuqizimin e vendimit mbi pezullimin parandalues të datës 03.12.2019: Ankesën drejtuar KZKA-së me numër të protokollit 10348 të datës 18.12.2019: Përgjigjen në ankesë për shfuqizimin e vendimit mbi pezullimin parandalues: Vendimin me numër të protokollit 276 të datës 20.01.2020: Shkresën lidhur me ndryshimin në listë të pagave.

Kolegji për shqyrtimin e ankesave, pasi ka shqyrtuar të gjitha shkresat e lëndës të dërguara nga ankuesi dhe organi i punësimit, ka konstatuar se pretendimi ankimor i ankuesit lidhur me ndalesën e pagesës prej 50% të pagës mujore, është i bazuar, sepse:

Kolegji për shqyrtimin e ankesave, ka konstatuar se me 19.09.2014 përmes vendimit me numër Nr.07/2014 të Menaxheres se Personelit të Agjencisë Kosovare të Privatizimit, ankuesi është pezulluar nga marrëdhënia e punës me 50% të pagës mujore, pas njoftimit me numër PPS 36/14 dhe PPKR.nr.44/2014 të datës 18.09.2014 të Gjykatës Themelore në Prizren se ndaj ankuesit ka filluar procedura penale.

Pas hyrjes në fuqi të Ligjit për Zyrtarët Publik, Drejtori Menaxhues i Agjencisë Kosovare të Privatizimit, me datë 01.09.2020 ka nxjerr vendimin me numër DM 220/2020 përmes të cilit ankuesit

ia ka ndërprerë pagesën prej 50% të pagës mujore të cilën ankuesi e realizonte gjatë kohës se pezullimit parandalues, me arsyetimin se Ligji për Zyrtarët Publik, i cili ka hyrë në fuqi me datë 09.07.2020 nuk parasheh kompensim për rastet e pezullimit parandalues.

Kolegji për shqyrtimin e ankesave, bazuar në shkresat e lëndës ka konstatuar se Vendimi Nr.07/2014 i datës 19.09.2014 i Agjencisë Kosovare të Privatizimit, për pezullimin e ankuesit nga detyra me 50% të pagës mujore, është nxjerr bazuar në dispozitat e Ligjit Nr.03/L-149 për Shërbimin Civil në Republikën e Kosovës, përkatësisht nenin 69 paragrafi 1 nen paragrafi 1.1, ku përcaktohet së: 1. *Nëpunësit civilë pezullohen, me pagesë 50% të rrogës se tij/saj, menjëherë nga detyra nga organi përgjegjës për menaxhimin e personelit të institucionit punëdhënës nëse: 1.1.kundër tij/saj është iniciuar procedurë penale për kryerje të veprës penale gjatë ushtrimit të funksioneve të tij/sajë, dhe paragrafi 2, ku përcaktohet se: Në rast të pezullimit parandalues, nëpunësi civil do të marrë 50% të rrogës së tij/saj gjatë tërë kohëzgjatjes së pezullimit, deri në marrjen e vendimit përfundimtar nga gjykata.* Andaj, Kolegji vlerëson se Drejtori Menaxhues i Agjencisë Kosovare të Privatizimit me rastin e nxjerrjes së Vendimit numër DM 220/2020 të datës 01.09.2020 për ndalimin e 50% të pagës mujore të ankuesit, duke u thirrur në dispozitat e nenit 58 paragrafi 4 të Ligjit Nr.06/L-114 për Zyrtarët Publikë, gabimisht ka aplikuar dispozitat e ligjit material, në dëm të ankuesit, sepse neni 58 paragrafi 4 aplikohen vetëm për nëpunësit civil të cilët pezullohen nga detyra sipas dispozitave të Ligjit Nr.06/L-114 për Zyrtarët Publikë, kështu që Kolegji konstaton se pretendimi ankimor i ankuesit lidhur me ndërprerjen e pagesës prej 50% të pagës mujore, është i bazuar, dhe në këtë kuptim, Kolegji vlerëson se ankuesi ka të drejtë të përfitojë 50% të pagës mujore gjatë tërë kohës se pezullimit, deri në marrjen e vendimit përfundimtar nga gjykata, siç përcaktohet me nenin 69 paragrafi 2 të Ligjit Nr.03/L-149 për Shërbimin Civil në Republikën e Kosovës.

Kolegji për shqyrtimin e ankesave, pasi ka shqyrtuar të gjitha shkresat e lëndës, ka konstatuar se pretendimi i ankuesit për kthim në vendin e tij të punës, është i pa bazuar, sepse:

Ankuesi në ankesën e tij pretendon se me hyrjen në fuqi të Ligji Nr. 06/L-114 për Zyrtarët Publikë është anuluar baza ligjore e vendimit Nr.07/2014 të datës 19.09.2014 për pezullim parandalues, për faktin se Ligji për Zyrtarët Publikë, i cili ka hyrë në fuqi me datë 09.07.2020 nuk parasheh mundësin e pezullimit parandalues të nëpunësit civil për shkak të fillimit të hetimeve, kështu që ankuesi pretendon te anulohet vendimi për pezullim parandalues dhe i njëjti të kthehet në punë me të gjitha të drejtat dhe detyrimet nga marrëdhënia e punës.

Kolegji për shqyrtimin e ankesave, lidhur me pretendimin ankimor të ankuesit ka analizuar dispozitat e Ligjit për Zyrtarët Publik dhe ka konstatuar se me dispozitat e nenit 56 të këtij ligji janë përcaktuar rastet kur pezullohet nëpunësi civil sipas detyrës zyrtare nga organi përkatës i punëdhënësit, ku sipas paragrafi 1 nen paragrafi 1.4 të kësaj dispozite ligjore përcakton se: *nëpunësi civil pezullohet nga detyra kur gjykata vendos ndaj nëpunësit civil si masë parandaluese penale pezullimin e ushtrimit të detyrës apo shërbimit publik, sipas ligjit në fuqi.* Në këtë kontekst Kolegji ka analizuar edhe dispozitat e nenit 69 paragrafi 1 nen paragrafi 1.1 të Ligjit Nr.03/L-149 për Shërbimin Civil në Republikën e Kosovës, dhe ka konstatuar se pezullimi parandalues në kuptim të këtyre dispozitave ligjore nuk është masë disiplinore e cila i shqiptohet nëpunësit civil për shkelje të detyrave të punës, por është masë parandaluese e cila merret në raport me një procedurë të iniciuar penale ndaj nëpunësit civil dhe ka për qëllim sigurimin e zbatimit të suksesshëm të procedurës penale. Andaj, nisur nga kjo, Kolegji për shqyrtimin e ankesave konsideron së për rastet pezullimit parandalues të cilat kanë filluar sipas dispozitave të nenit 69 paragrafi 1 të Ligjit Nr.03/L-149 për Shërbimin Civil,



nuk mund të aplikohet neni 56 paragrafi 1 nen paragrafi 1.4 të Ligjit Nr.06/L-114 për Zyrtaret Publik, sepse është e ndaluar fuqia prapavepruese e normës juridike, përveç nëse një gjë e tillë përcaktohet me ligj. Kolegji për shqyrtimin e ankesave, ka analizuar edhe nenin 83 paragrafi 9 të Ligji Nr. 06/L-114 për Zyrtarët Publikë, e cila përcakton se; ... *Për procedurat disiplinore në proces, nëse kjo është më e favorshme për nëpunësin civil në fjalë, me kërkesën e tij, zbatohen procedurat e ligjit të ri. E njëjta procedurë do të aplikohet për procedurat e ankesave dhe kontesteve, dhe ka konstatuar se kjo dispozite ligjore i referohet vetëm procedurave disiplinore dhe procedurave të ankesave, por jo edhe masës se pezullimit parandalues e cila nuk është mase disiplinore por është mase parandaluese e cila vendoset vetëm pas plotësimit të kushteve ligjore në procedurë penale, dhe është e lidhur me zhvillimin e procedurës penale deri në vendimin përfundimtar të gjykatës, andaj si rrjedhore, Kolegji vlerëson se nëpunësit civil të cilët janë pezulluar sipas dispozitave të Ligjit Nr.03/L-149 për Shërbimin Civil në Republikën e Kosovës, mbi këtë bazë ligjore duhet të vazhdoje pezullimi deri në marrjen e vendimit përfundimtar nga gjykata, siç përcaktohet me nenin 69 paragrafi 2 të Ligjit Nr.03/L-149 për Shërbimin Civil në Republikën e Kosovës, kështu që Kolegji vlerëson se pretendimi ankimor i ankuesit lidhur me anulimin e vendimit për pezullim parandalues dhe kthimin në vendin e punës, është i pa bazuar.*

Bazuar në këto rrethana, Kolegji për shqyrtimin e ankesës, pas analizimit dhe vlerësimit të të gjitha shkresave të lëndës si dhe duke u bazuar në kompetencën e Këshillit, vendosi si në diapozitiv të këtij Vendimi.

Në rast të moszbatimit të vendimit të Këshillit nga personi përgjegjës i përcaktuar në dispozitiv të këtij vendimi, Kryetari i Këshillit ndërmer veprimet në pajtim me nenin 21, 23 dhe 24 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, duke aplikuar edhe ndalimin e 50 % të pagës mujore për personin përgjegjës, deri në zbatimin e vendimit të Këshillit.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në gjykatën kompetente, Gjykatën Themelore në Prishtinë-Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

**Këshilli i Pavarur Mbikëqyrës për Shërbimin Civil të Kosovës**  
**Lënda me numër A.nr.290/2020**

**Ilire Mehmeti-Shaqiri**

**Procesmbajtëse**

**Jeton KOCA**  
**Kryetar i Kolegjit**

**Vendimi i dërgohet:**

- Ankuesit [REDACTED]
- Drejtorit Menaxhues të Agjencisë Kosovare të Privatizimit;
- Menaxherit të Burimeve Njerëzore në Agjencinë Kosovare të Privatizimit;
- Arkivit të KPMSHCK-së;